

---

## PWYLLGOR PENSIYNAU DYDD MERCHER, 14 HYDREF 2020

---

### YN BRESENNOL:

**Cynghorwyr:** Stephen Churchman, Goronwy Edwards (Cyngor Bwrdeistrefol Sirol Conwy), Simon Glyn, John Brynmor Hughes, Peredur Jenkins, Aled Wyn Jones, John Pughe Roberts, Ioan Thomas, a Robin Williams (Cyngor Sir Ynys Môn)

**Swyddogion:** Dafydd Edwards (Pennaeth Cyllid), Delyth Jones-Thomas (Rheolwr Buddsoddi), Meirion Jones (Rheolwr Pensiynau) a Lowri Haf Evans (Swyddog Gwasanaethau Democratiaeth)

**Eraill a wahoddwyd:** H Eifion Jones (Aelod Bwrdd Pensiwn – arsylwi)

Croesawyd y Cynghorydd Goronwy Edwards (cynrychiolydd Cyngor Bwrdeistrefol Sirol Conwy) i'w gyfarfod cyntaf a chroesawyd y Cynghorydd Simon Glyn yn ôl fel Aelod Plaid Cymru (Cyngor Gwynedd). Diolchwyd i gyn cynrychiolydd Plaid Cymru y Cynghorydd Peter Read am ei wasanaeth

#### 1. ETHOL CADEIRYDD

**PENDERFYNWYD ethol y Cynghorydd Peredur Jenkins yn Gadeirydd i'r Pwyllgor hwn am y flwyddyn 2020 /2021**

Diolchwyd i'r Cynghorydd John Pughe Roberts am ei waith fel Cadeirydd y Pwyllgor Pensiynau 2018 / 20. Gydag ychwanegiadau i gyfrifoldebau'r swydd yn rhanbarthol a chenedlaethol, diolchwyd iddo am ei ymroddiad i'r swydd a hynny mewn cyfnod heriol ac anodd iddo.

#### 2. ETHOL IS-GADEIRYDD

**PENDERFYNWYD ethol y Cynghorydd Stephen Churchman yn Is-gadeirydd i'r Pwyllgor hwn am y flwyddyn 2020 / 21**

#### 3. YMDDIHEURIADAU

Dim i'w nodi

#### 4. DATGAN BUDDIANT PERSONOL

Amlygodd yr Aelodau fuddiant nad oedd yn rhagfarnu oherwydd eu bod yn Aelodau o'r Gronfa Bensiwn

#### 5. MATERION BRYD

Dim i'w nodi

#### 6. COFNODION

Bu i'r Cadeirydd dderbyn cofnodion y cyfarfod a gynhaliwyd ar 23 Gorffennaf 2020 fel rhai cywir.

## 7. CYFRIFON TERFYNOL 2019/20 - CRONFA BENSIWN GWYNEDD

Cyflwynwyd adroddiad ynghyd a Datganiad o Gyfrifon Cronfa Bensiwn Gwynedd 2019/20 (ôl archwiliad), gan y Pennaeth Cyllid yn darparu manylion gweithgareddau ariannol y Gronfa Bensiwn yn ystod y flwyddyn a ddaeth i ben Mawrth 31ain 2020. Atgoffwyd yr Aelodau bod drafft o'r cyfrifon wedi eu cyflwyno i gyfarfod 23ain Gorffennaf 2020 ac er nad oedd y ffigyrau wedi newid, tynnwyd sylw at rai addasiadau i'r naratif yn dilyn archwiliad gan gwmni Deloitte. Cyfeiriwyd at adroddiad ISA260 ar ran Archwilydd Cyffredinol Cymru yn manylu ar eu darganfyddiadau. Ategwyd mai'r Pwyllgor Archwilio sydd â chyfrifoldeb i dderbyn y cyfrifon yn ffurfiol ac y byddent yn cael eu cyflwyno i'r Pwyllgor Archwilio ar y 15fed o Hydref ar gyfer cymeradwyaeth.

Cyfeiriwyd at ychwanegiadau gan yr Archwilwyr i Nodyn 4 ac 5 lle nodi'r gwybodaeth ar brisiadau'r gronfa eiddo. Yn dilyn atal masnachu ar gronfeydd eiddo fis Mawrth, adroddwyd bod y cronfeydd eiddo bellach wedi ail ddechrau masnachu a'r ataliad wedi ei godi ers dechrau mis Medi. Er bod y swm presennol ychydig yn is na'r hyn a amlygwyd ddiwedd Mawrth 2020, yn ôl Hymans, nid oedd yn sylweddol is na'r hyn oedd yn rhesymol. O ystyried bod y portffolio yn un eang, adroddwyd bod y portffolio wedi dal ei dir yn eithaf ac y byddai modd cynnal trafodaeth ac amlygu unrhyw bryderon gyda'r Rheolwyr sydd yn buddsoddi ar ran y Gronfa yng nghyfarfod y Panel mis Tachwedd.

Adroddwyd er nad oedd yr Archwilwyr wedi amlygu un mater penodol i Gronfa Bensiwn Gwynedd, eu bod wedi nodi tri achos fyddai'n debygol o gael effaith ar y Gronfa.

- Cydraddoli GMP
- Achos McCloud
- Achos Goodwin

Ategwyd bod yr achosion hyn yn gyffredin ar draws yr holl gronfeydd pensiwn a bod Gwynedd eisoes wedi dechrau cydweithio gyda'r actiwari yn achos Mc Cloud a Goodwin.

Yn ystod y drafodaeth ddilynol nodwyd y sylw canlynol:

- Gyda symudiad mewn buddsoddiadau eiddo a gwerthoedd i ffwrdd o'r stryd fawr i mewn i ystordai, dylid ystyried newidiadau i arferion gwaith yn y tymor hir. Rhaid bod yn agored i gyfleoedd ac ymateb i'r newidiadau hyn.

Gwerthfawrogwyd ymroddiad a chywirdeb y gwaith a diolchwyd i'r Rheolwr Buddsoddi a'r tîm am baratoi'r gwaith.

Adroddwyd bod Marina Parry Owen (Swyddog Pensiynau a Buddsoddiadau) yn dioddef o Glefyd Addisons. Dymuniad y Pwyllgor oedd anfon eu dymuniadau gorau at Marina gan ddiolch iddi am ei gwaith yn yr Uned Pensiynau a Buddsoddi.

### **PENDERFYNWYD:**

Derbyn, er gwybodaeth

- Y Datganiad o'r Cyfrifon 2019/20 (ôl archwiliad)
- Yr adroddiad 'ISA260' gan Deloitte ar gyfer Cronfa Bensiwn Gwynedd
- Y Llythyr Cynrychiolaeth

## **8. DIWEDDARIAD INCWM SEFYDLOG PARTNERIAETH PENSIWN CYMRU**

Cyflwynwyd adroddiad, er gwybodaeth, gan y Rheolwr Buddsoddi yn rhoi diweddariad ar y gronfa Incwm Sefydlog. Adroddwyd bod buddsoddiad o £166,119,549.08 gyda Fidelity Global Equity wedi ei drosglwyddo yn llwyddiannus ar y 27ain o Orffennaf 2020 i'r Multi Asset Credit Fund.

Yn ychwanegol, nodwyd bod bwriad lansio Cronfa Abolute Return Bond yng Ngorffennaf 2020 ond darganfuwyd nad oedd buddsoddiadau presennol yn gymwys i'r strwythur ACS. Yn dilyn gwaith ymchwil pellach gan Paul Potter - Hymans Robertson, a thrafodaeth yn y Panel Buddsoddi ym mis Medi, lansiwyd yr Absolute Return Bond Fund ar y 1af o Hydref gyda'r buddsoddiad gyda Insight o £291,238,172.22 erbyn hyn wedi trosglwyddo yn llwyddiannus i'r gronfa.

**PENDERFYNWYD nodi'r wybodaeth**

## **9. CAU ALLAN Y WASG A'R CYHOEDD**

**PENDERFYNWYD** cau'r wasg a'r cyhoedd allan o'r cyfarfod yn ystod y drafodaeth ar yr eitem canlynol gan ei fod yn debygol y datgelir gwybodaeth eithriedig fel y'i diffinnir ym mharagraff 14 o Atodiad 12A o Ddeddf Llywodraeth Leol 1972 Gwybodaeth ynglŷn â thrafodion ariannol neu fusnes unrhyw berson penodol( yn cynnwys yr awdurdod sydd yn dal y wybodaeth hynny). Mae budd cyhoeddus cydnabyddedig mewn bod yn agored ynglŷn â defnydd adnoddau cyhoeddus a materion ariannol cysylltiedig. Cydnabyddir fodd bynnag fod adegau, er gwarchod buddiannau ariannol awdurdod cyhoeddus fod angen trafod gwybodaeth fasnachol heb ei gyhoeddi. Mae'r adroddiad yn benodol ynglŷn â dyfarnu contractau ac yn cynnwys manylion am y cynigion ynghyd a statws a busnes y darpar gyflenwyr. Byddai cyhoeddi gwybodaeth fasnachol sensitif o'r math yma yn gallu taseilio hyder darparwyr i ddod a phrisiau ymlaen gerbron y Cyngor ac felly gallu'r Cyngor i gaffael yn llwyddiannus. Byddai hyn yn groes i'r budd cyhoeddus ehangach o sicrhau gwerth am arian a'r allbwn cyfansawdd gorau . Am y rhesymau yma rwy'n fodlon fod y mater yn gaeedig er y budd cyhoeddus.

## **10. IS-GRONFA ECWITI MARCHNADOEDD DATBLYGOL PARTNERIAETH PENSIWN CYMRU**

Cyflwynwyd adroddiad gan y Rheolwr Buddsoddi yn gwneud cais i'r Pwyllgor gytuno i strwythur yr Is-gronfa Marchnadoedd Datblygol Partneriaeth Pensiwn Cymru. Adroddwyd bod yr opsiynau wedi ei cyflwyno i'r Bartneriaeth ac eisoes wedi eu cymeradwyo gan y Cydbwyllgor Llywodraethu ar y 12fed o Fawrth 2020. Bydd disgwyl i'r Is-gronfa gael ei lansio yng Ngwanwyn 2021.

**PENDERFYNWYD cymeradwyo strwythur yr Is-gronfa**

## **11. AIL AGOR Y CYFARFOD I'R WASG A'R CYHOEDD**

## **PENDERFYNWYD ail agor y cyfarfod i'r wasg a'r cyhoedd**

### **12. CRONFA CARBON ISEL BLACK ROCK**

Cyflwynwyd adroddiad gan y Rheolwr Buddsoddi yn gofyn i'r Pwyllgor gytuno i drosglwyddo cronfa bresennol carbon isel Black Rock i'r ACS World Low Carbon Equity Tracker Fund.

Atgoffwyd yr Aelodau bod penderfyniad wedi ei wneud yng nghyfarfod mis Gorffennaf i drosglwyddo swm o gronfa bresennol Black Rock, ond ers hynny bod Black Rock wedi datblygu cronfa newydd gyda ffocws bellach ar leihau carbon o gymharu â'r gronfa bresennol.

Amlygwyd bod y gronfa newydd yn cynnwys y newidiadau canlynol;

- sgriniau tanwydd ffosil cyn yr optimeiddio carbon isel
- ar gyfer cynnydd mewn gwall olrhain o 0.30% i 0.50%, bydd carbon yn cael ei leihau 44%

class=WordSection2>

Nodwyd bod trafodaeth ar y gronfa newydd wedi ei gynnal yn y Panel Buddsoddi diweddar a bod yr ymgynghorwyr wedi cytuno y byddai'n fuddiol trosglwyddo i'r gronfa newydd.

Yn ystod y drafodaeth ddilynol nodwyd y sylwadau canlynol:

- bod y penderfyniad i fuddsoddi mewn cronfeydd sydd yn lleihau carbon yn gydnaws a daliadau'r strategaeth buddsoddi a gymeradwywyd ym misTachwedd 2019
- nad oedd costau mawr i drosglwyddo

**PENDERFYNWYD cymeradwyo symud y gronfa bresennol yn yr ACS World Low Carbon Equity Tracker Fund (MSCI World Low Carbon Target i'r ACS WORLD LOW CARBON EQUITY TRACKER FUND (MSCI WORLD LOW CARBON TARGET EX FOSSIL FUELS INDEX) yn unol a'r drafodaeth yn y Panel Buddsoddi diweddaraf.**

### **13. GWEINYDDIAETH PENSIYNAU**

Derbyniwyd adroddiad gan y Rheolwr Pensiynau yn adrodd ar ymateb y Gwasanaeth i weithio drwy pandemig covid 19. Adroddwyd bod y Gwasanaeth wedi bod yn gweithio o adref yn llwyddiannus ers 25/03/2020. Amlygwyd nad oedd y gwasanaeth wedi dioddef oherwydd y newid i batrwm gwaith ac er yr heriau o fod yn hyblyg gyda rhai staff ac eraill yn trosglwyddo i adrannau eraill, ymddengys bod y newid wedi bod yn llesol i'r adran weinyddol. Blaenoriaethwyd y gwaith a gwnaed defnydd o'r cyfrwng Teams i gyfathrebu a chadw cysylltiad yn lleol ac yn rhanbarthol.

Nodwyd bod cynnydd yn nefnydd system hunanwasanaeth Aelodau a bod yr argyfwng wedi annog y tîm i weithio yn ddi-bapur (hyn yn fwy effeithiol, yn gynt ac yn rhatach). Ategwyd bod amryw o dasgau a phrosiectau angen sylw a rheiny wedi cael ei hamserlennu ar gyfer y misoedd nesaf.

Diolchwyd am yr adroddiad cadarnhaol ac am weithredu'r pensiyneu mor effeithiol.

Mewn ymateb i gwestiwn ynglŷn â thaliadau staff ar ffyrlo ac, os yr oeddynt ar eu colled, a oedd yr Undebau wedi tynnu sylw at y mater? nodwyd bod y sefyllfa yn ddibynnol ar y cyflogwr yn talu'r 20% ychwanegol. Awgrymwyd bod y cwmnïau mwyaf yn fwy tebygol o dalu'r ychwanegiad. Eglurwyd, os na fyddai'r ychwanegiad yn cael ei dalu, yna byddai'r cyfranddaliadau yn cael eu tynnu oddi ar yr 80% ac o ganlyniad, bydd y staff ar eu colled. Ategwyd bod y cyfranddaliadau yn unol â'r pensiwn ac y byddai'r Undebau yn debygol o herio'r Cyflogwyr yn hytrach na'r Gronfa. Nodwyd hefyd bod ychydig o anfantais i'r rhai hynny sydd ar ffyrlo ac yn ymddeol eleni gan fod rhaid edrych dros y tair blynedd ddiwethaf i ganfod y tal terfynol i sicrhau tegwch.

Mewn ymateb i gwestiwn ynglŷn â lleihau'r nifer o lythyrau papur sydd yn cael eu postio yn wythnosol, nodwyd nad oedd hyn yn ymarferol bosib bob tro gan fod rhai pobl yn dymuno cael llythyr papur a bod angen ymateb i rai llythyrau gyda llofnod. Er hynny, nodwyd bod defnyddio argraffdy Cyngor Gwynedd neu gwmni preifat i ddosbarthu'r llythyrau yn fwy effeithiol wedi cael ei ystyried ynghyd a sicrhau bod pob ymgais yn cael ei wneud i ddefnyddio e-byst pan yn bosib.

### **PENDERFYNWYD nodi'r wybodaeth**

Dechreuodd y cyfarfod am 10.30 y.b. a daeth i ben am 11.50 y.b.

---

**CADEIRYDD**